

UMS serah baucar buku

Jan 13 01 2012 27

KOTA KINABALU 17 Jan. - Pemberian baucar buku 1Malaysia bernilai RM200 kepada mahasiswa yang mendaftar pada sesi pengambilan baru-baru ini merupakan salah satu usaha institusi pengajian itu merancakkan budaya membaca di kalangan mahasiswa.

Naib Canselor Universiti Malaysia Sabah (UMS), Prof. Datuk Seri Dr. Kamaruzaman Ampon berkata, baucar tersebut diharapkan dapat menyuburkan lagi minat di kalangan mahasiswa membeli bahan bacaan ilmiah serta mengurangkan kos perbelanjaan mereka untuk membeli bahan rujukan yang diperlukan.

Katanya, pemberian dalam bentuk baucar yang dilengkapkan dengan nombor siri akan membolehkan pihak universiti memastikan ia benar-benar digunakan untuk membeli bahan bacaan ilmiah dan bukannya bahan bacaan ringan.

"Kaunter penyerahan baucar telah dibuka baru-baru ini di Pusat Sehati, Jabatan Hal Ehwal Pelajar di Anjung Siswa bagi mengedarkan baucar tersebut. Mahasiswa yang belum mendapatnya boleh memperoleh baucar di kaunter Jabatan Bendahari sehingga 31 Mei depan," katanya di sini baru-baru ini.

Beliau berkata demikian pada majlis Pelancaran Penyerahan Baucar Buku 1Malaysia di Dewan Canselor UMS.

Mengulas lanjut, Kamaruzaman berkata, menerusi kerjasama dengan Koperasi UMS, satu pesta buku akan diadakan bagi membolehkan baucar tersebut ditunaikan oleh mahasiswa dalam tempoh sah laku yang ditetapkan.